

de Uulewapper

OETGAVE VAN SJTADSVASTELAOVESVERENIGING D'N UUL REMUNJ



Prins Sem d'n Eerste

JEUGDPRINS D'N UUL 2014

Nuuj riddaksie leje

Leef Uulekienjer!

't Is fees in de sjtad biej D'n Uul! Want ós Sjtadsvastelaovesvereniging viert 'n jubeleijem. 't Is al 7x11 jaor geleje det D'n Uul is opgerich. De 7 is veur väöl miense 'n gelöksgetal en de 11 is 't gekkegetal, dus d'r sjteit ós 'n geweldig 7x11 jubeleijem te wachte. Dao heurt netuurlik och 'ne geweldige jubeleijem Jeugprins biej. En dae höbbe veer noe: Sem I! Same mit zien adjudante Rutger en Christophe en mit zien Prinses... euhm... Prinselike Assistant Renske geit Sem I ós allemaal veur in 't vastelaovesfees van dit jaor. Dao höbbe veer nemes anges biej neudig, want:

Mit D'n Uul 7x11, gek doon veer zellef!

In deze feestelike 7x11 jubeleijem Uulewapper vindj geer, behalve alles waat geer wilt weite euver eure Prins Sem I, och allerlei nuufts en tips euver feeste. Wiej regels se 'n groot fees? Waat kins se vanteveure aete? Wiej kins se 't hoes versiere? Waem haet d'r nog meer 'n jubeleijemfees? En netuurlik puzels en mòppen... nog väöl meer. Sjtuur mich gerös 'ne e-mail en laot mich weite waat geer d'r dit jaor van vindj.

De riddaksie is beheurlik verangerd. Nao zes jaor knutsele, kaoke en sjriewe haet Jeanette aafsjiied genaome. Veur alles waas se mich geleerd höbs zegk ich danke!! Ómdet Carlijn is verhoes nao 't Noorde is het och gesjtop. Mer Bridget en ich höbbe gooij hulp gekrege van Damiaan I, Anne en Sabine. Hiej naeve sjtelle ze zich aan uch veur.

Zo! Genóg gesjreve. Noe eers FEESTE! En dan laeze!

Juulke



Ich bön Anne Kouwenberg, bön 27 jaor en kóm oet Landgraaf; "van d'r Sjeet" zegke ze dao. Al 2,5 jaor woon ich in 't Uuleriek en ich höb al mennig vastelaovesfees van D'n Uul mitgevierd. Feesjes van D'n Uul zeen altied gooij feesjes. Vastelaovend is veur mich de sjoonste tied van 't jaor. Sjminke, verkleije en lekker gek doon, dao haaj ich van! En diej leefde veur de vastelaovend wil ich gaer mit kienjer deile.



Ich bön Damiaan Bertrams. Ich bön biechnao 12 jaor en zit op basissjool Aan de Roer. Mien hobbies zeen hokkiej en piano. Ich vinj Vastelaovend heel leuk. Mesjien kint geer mich waal, ómdet ich veurig jaor jeugprins van D'n Uul bön gewaaes. Ich doon och mit aan de Kienermiddaag van dit jaor. Ich doon mit aan de riddaksie van de Uulewapper, ómdet 't mich heel erg leuk leek óm te doon. Ich höb och nog väöl aaj oetgaves bewaard.



Ich bön Sabine Koopman-Lyon, bön 39 jaor en woon mit miene man vanaaf juni weer in Remunj. Veurdet ich in dees sjtad woonde, kwaam ich toch al dök nao de Sjtasiefestasie, want det top-fees wól ich ech neet misse. De kultuur, de gezelligheid, de sfeer, de leedjes en de kreativiteit van ederein... dao haaj ich van. Es juf wil ik det gaer mit gaeve aan de kienjer; daoróm bön ich biej de riddaksie.



3

Sem I van Atteveld

Sjadsjeugprins van D'n Uul in 't Jubeleijemsezoen 7x11

Mit D'n Uul 7x11, gek doon veer zellef Det is de liefsjpreuk van oze nuje Sjadsjeugprins Sem I van Atteveld, dae in dit jubeleijemsezoen same mit zien twee Adjudante Christophe Doprolis en Rutger Geurtz en een Prinselike Assistent(!) te weite Renske Sips, de Remunjse jeug en Sjadsvastelaovesvereniging D'n Uul moog veur gaon es Sem d'n eerste. Mit zien veere wille ze d'r'n sjoen jubeleijemsezoen van gaon make, waat ouch nog ins'n lekker lank sezoen is. "Mit D'n Uul 7x11, gek doon veer zellef", beteikent veur Sem I: laot dich geweun gaon, doot neet zo sjtief en maak d'r'n groot fees van veur jónk enaad!

Sem van Atteveld waerde gebaore op 12 oktober 2002 in 't 6x11 jubeleijemsezoen van D'n Uul in 't krankehoes van Remunj. Nao vief daag verhoesde Sem nao 't Kateriek. Sem is dus noe 11 jaor aad.

Sem haet ein jónger breurke, Sil, dae in janne warie 2014 8 jaor waert. Sil is geduiip in de vastelaovesmès in 2006, toen Rob II Schaepkens Sjadsprins waas en Paul III Sangers Sjadsjeugprins.

Sem is de zoon van Jan-Paul en Tanja van Atteveld-Cox. Mam Tanja is netuurlik gein onbekinde biej Sjadsvastelaovesvereniging D'n Uul. Vanaaf 15 jaor danste Tanja biej de Damesgarde en noe is Tanja al inkele jaore aktief in 't Daeliks Besjtuur van D'n Uul.

In 't dageliks laeve wirk Tanja mit kienjer diej 't neet mekkelik höbbe. Vanaaf 8 jaor leep Tanja ouch al mit biej de Prinselike Stadtsgarde. Dan is de link nao pap Jan-Paul ouch gelag, want Jan-Paul is al jaore lank lid van de stadsgarde. Eers es offesear en veurzitter van de Prinselike Stadtgarde. Noe is d'r "geweun" sjeldao. Tegelikertied is d'r wirkzaam in de 7x11 jubeleijemkemissie van D'n Uul, wó det d'r veurzitter is van de jubeleijemzónndaag waat betruf pergram en oetveuring. In 't dageliks laeve wirk Jan-Paul mit kienjer mit perbleme waat betruf gedraag.

't Gezin woont noe prinsheerlijk in de Dr. Leurssjtraot, op 'ne sjteinworp aafsjtand van 't nuje Uulenès kefee Braam.

Sem geit in 't dageliks laeve ouch nao sjool, te weite de Sjteine Brök, in groep 8 biej meester Han Janssen.

Zien hobbies besjtaan oet hokkieje biej Concordia in de D2, vertelle taege luuj en laeze inveral gesjiedenisbeuk. Op tilleviesie kiek d'rveral nao South Park. Sem zien favorite aete besjteit oet garnale! Charlie is ziene pappegej. Sem duit al vanaaf 4 jaor mit aan de kienjermiddaag van D'n Uul en Sem en zien breurke Sil ginge al van jongs aaf aan mit in d'n optoch mit de Prinselike Stadtsgarde.



Mit D'n Uul 7x11, gek doon veer zellef

Es hoesorde van Sem is gekaoze veur Juulke 't Uulke es basis. Juulke is in 'tzelfde jaor gebaore es Sil en Sem mis Juulke waal een bietje. Hae vónj 't leuk en sjiek óm Juulke 'n baeter plek in 't geheel te gaeve. Hae wilt gaer det de kienjer Juulke weer herkinne. In de hoesorde kómme trök de kleure van de Remunjse vlag, wit en blouw, 't Uule logo van 't 7x11 jubeleijem en ziene liefsjpreuk.

Sem waerde in "STAR WARS"-sjtiel oetgerope, kópleet in Darth Vader outfit. Hae keek al vanaaf jongs aaf aan nao alle Star War films en sjeerde mit de Star Wars lego zien eige verhaoe.

Ouch de Adjudante kwame in ein Star Wars leger outfit óm 't gans kópleet te make.

Die Adjudante zeen, wiej gezag, Christophe Doprolis, Rutger Geurtz en de Prinselike Assistent Renske Sips.

Adjudant Christophe (12 jaor) is de zoon van Angelo en José. Hae zit ouch biej Sem in groep 8 van de Sjteine Brök. Ze zeen al heel lank gooij vrunj. Christophe sjeepelt kwetsjbuuvel; in 't sezoen gaon veer dao zeker nog meer van heure.

Adjudant Rutger (11 jaor) is de zoon van Roger Geurtz en Muriël Consten. Rutger haet 'n grote zös van 13 jaor, Marijn. Hae zit in groep 8 van de Stapsteen en Rutger duit ouch hokkieje in de D1 biej Concordia. Dao kinne ze elkaar ouch van. Ze zeen verder gooij vrunj van elkaar.

Veer 't eers is d'r ein Prinselike Assistent en ouch nog ein maedje, Renske Sips! Renske (11 jaor) is de dochter van Nils en Pascale en het zit in groep 8 van Aan de Roer. Renske haet 'ne grote broor van 13 jaor, Torn. Renske duit ouch hokkieje biej Concordia biej de maedjes D1. Sem en Renske kinne elkaar van nichske Bo van Rijt; Renske is de beste vrundin van Bo. Sem vónj 't leuk om Renske ouch 'n plaatse te gaeve in 't Jeugprinselik Gezelsjap es Prinselike Assistent.

In 't Prinsekruuts, weer gemaak door Rob Verstappen, sjtaon ouch de name van Christophe, Rutger en Renske gegraveerd.

Mit z'n veere gaon ze d'r'n sjoen jubeleijemsezoen van make en ze höbbe d'r bezónjer väöl zin in. Ich dink ouch waal det det guit lökke. Det alles ónger Sem I ziene liefsjpreuk:

MIT D'N UUL 7X11, GEK DOON VEER ZELLEF

Veer winse 't ganse Jeugprinselik Gezelsjap van D'n Uul en häör elders heel väöl plezeer en een sjoen en sjitterend vastelaovessezoen toe.

Ronald Klaver

Erik Snoek

Kemissie Sjadsjeugprins D'n Uul Remunj



- det veer greuts zeen om in t veurqenger te moge zeen.
- det veer echte vaste laoves.
- det t "gek" doon biej os in vaste-
- det veer greuts dr op zeen actief zeen gewaes veur de juubelijum jaor 7x11 ugge
- det de meisle van os in t jaor van 6x11 gebaore zeen.
- det veer s sjole in Remmij vertegewoordige.
- det veer allemaal in ein gooi condisie zeen, mit dank aan Concor dia.
- det veer t sjpeel sjpele zowie t sjpeel gesjpeeld mol waere en det dao biej os nemes boetesjpele sjteit!
- det veer gemeind hobbbe eine Prinselikke Assistent aan te sjelle zodet deze vaste laovend te gek geit verlaupe!
- det veer besjerminq kriege van de Prinselikke Stadts Garde.
- det veer noe al weite det t aaftraeje pien geit doon.

EN DET ALLES ÖGER OZE LIETSJPREUK:

**MIT D'N UUL 7X11
"Gek DOON Veer zelleF"**

Remmij
12 januari
2014

GALERIE VAN (AAD)JEUGPRINSE MIT HÄÖR ADJUDANTE



2012
Rik I en adjudante
Dante en Mees

2013
Damiaan I en adjudante
Jules en Jort



2014
Sem I, adjudante Rutger en Christophe
en Prinselike Assistent Renske

Kiek veur de foto's van de ajere aad jeugprinse en häör adjudante en ouch veur de interviews op www.dn-uul.nl

Hutseledeknutsel

Biej 'n jubeleijemfees heure belónne, heel väöl belónne. En op de feeste van D'n Uul zeen veural Uule, heel väöl Uule. Es se det kombineers kriegs se 'n luchting fees mit väöl Uule-belónne!

Waat höbs se neudig?

- 'n paar belónne
- velle wit en broen pepier
- 'n zjwarte sjtif
- 'n sjeer
- liem




Luchting Uule

Waat móos se doon?

Blaos 'ne belón op en knuip 'm toe. Teiken twee grotere en eine kleinere driejhook op 't broene pepier en knip ze oet. Faaj óngeraan de driejheuk 'ne sentimaeter óm; dan kriegs se 'ne plekrandj. Faaj 't broene blaad döbbel. Teiken 'n peutje op 't döbbel gefaajde pepier en knip 't oet. Noe höbs se twee dezelfde peutjes. Twee keer teikene en knippe geit netuurlik ouch. Faaj ouch hiej van óngeraan 'ne sentimaeter óm. Haaj de knoup van de belón nao baoeve en plek de grote driejheuk (de ore) baoeve, de kleine (sjnavel) in 't midde en de twee peutjes óngeraan oppe belón.

Teiken twee ei-vormige rundjes op 't witte pepier; biejein óngeveer 1x11cm hoog en 1,5x11cm breed. Teiken mit de zjwarte sjtif twee dieke pupille en róndjóm de uig 'ne dieke randj. Plek de uig noe baoeve de sjnavel.

Maak nog 10 Uule-belónne en hang ze mit 'n tuike biejein wó se mer wils.



MIT VASTELAOVEND WAER ICH.... 1X11!

Wiej sjiek en uniek is det? Óm in 't jubeleijemjaor van D'n Uul zelf ouch 'n jubeleijem te viere! Mit de kómmende Vastelaovesdaag (1 toet en mit 5 meert) zeen d'r in gans Remunj mer 7 kienjer diej 1x11 waere. En d'r zeen zelfs 2 kienjer in Remunj diej oppe 11de van de 11de 1x11 zeen gewaore!



LUUK HENDRIKS

10

1-3-2014: eine Uulejóng (De Sjtapsjtein) en ein Erpelke

Kómmende Vastelaovend is 't 1x11 jaor geleje det ich waerde gebaore. 's Morges heel vreug op Vastelaoves zaoterdaag. Ein waek eerder dan verwach.... blikbaar wól ich de vastelaovend neet misse!!

Vastelaovend vier ich netuurlik in mien gebaortesjadt Remunj. 't Sjoonste vinj ich óm eder jaor weer 'n sjiike meneer te verzinnen óm mich te verkleije. Veurig jaor waas ich Al Capone. Wiej ich mich dit jaor verkleij, weit ich al maondje, mer det gaon ich neet verklappe....

Op de Sjtapsjtein waert Vastelaovend groots gevierd. Mit mien vrunj Jeroen en Jurrit make veer d'r same mit gans groep 8a ein groot fees van. D'n optoch door de stad is 't hoogtepuntj van de Vastelaovend veur de ganse famelie. Daonao trek ich mit vrunj en vrundinne oet de sjtraot en de buurt nao de Veursjadt.

In miene vrieje tied bön ich hokkiek kieper biej Concordia en sjeel ich piano. Ich vinj 't super leuk óm 1x11 jaor te waer. Ich haaj van gek doon en grepkes make, dus det 'gekkegetal' pas mich waal!




ALEXANDER PALS

11

3-3-2014: geine 1x11 jäörige

4-3-2014: ein Veldjmuuske



LISA POELS

2-3-2014: ein Uulemaedje (Hubertussjool) en ein Kaeterke

Ich bön gebaore in Milaan en woon vanaaf 2011 in Herte. Mien mam is Italiaans en miene pap kump oet Remunj. 't 'Remunjs' is 'n bietje lestig veur mich, mer det leer ich van mien vriendinnetjes.

Al vanaaf mien veerde jaor is ballet danse mien hobby. Dao veur gaon ich twee keer per waek nao Bree in Belsj. Ich bön al veur 'n paar eksames gesjlaag en höb noe 'graad 4'. En ich teiken och heel gaer.

Vastelaovend vinj ich leuk. Ich gaon gaer nao d'n optoch in Herte of Remunj. In Milaan waert 'Carnevale' ein waek later gevierd den op de meiste anger plaatse. Dao leep ich mit in de kienjeroptoch, dae waerde aafgesjlaote mit 'n fees in de aope lóch.

Naeve d'n optoch vinj ich 't verkleije en sjminke 't leukste. Toet noe toe waas ich verkleid es prinses, 'Winx', ballerina of kat.

Óm mit Vastelaovend jäörig te zein en ouch nog 1x11 jaor te waere vinj ich bès waal speciaal: den moog ich mit miene verjäördagaag lekker gek doon. Wiej veer 't verjäördagsfeesje viere is nog geheim, want angers weite de vriendinnetjes al waat d'r gebeure es ze dit laeze!



PLAETJES VAN MAEDJES

Fees, fees, fees... in de sjtad biej D'n Uul!

Vastelaovend is 'n fees en 'n fees is gein fees, zónger dans! Zeker in dit jubelijemjaor zal de Jeugprins uch allemaal de gardedans van 'zien eige' Kienjergarde aanbeje. En de maedjes van de Jeuggarde zitte ouch häör beste beinkes veur!



Kienjergarde 2014

Baoveste riej van links nao rechs: Puk Tromp, Noor van de Varst en Zoé van Asten.

Óngerste riej van links nao rechs:
Lisa Willemsen, Evie Boersma, Bo van Rijt, Maud van Etten, Sophie Opheij, Jenna Jamboers, Luca Manders en Fleur van de Varst.

Jaomer genóg neet oppe foto: Tessa Schulpen.

Dit jaor waert de Kienjergarde getraind door Ingrid Breugelmans en Nienke Wassenberg.
De begeleidsters zeen dit ganse sezoen Carla Klaver en Dagmar Cillekens.

De Kienjergarde dans de gardedans dit jaor op häör eige jubelijemleed: 't Is fees!



Jeuggarde 2014

Baoveste riej van links nao rechs: Claire Lambriex, Indy Evers, Maureen Mooren en Dene Roncken. Óngerste riej van links nao rechs: Femke Anne Favre, Katja Boersma, Melanie Hendrix, Maud Verstappen, Sanne Evers en Luna Lambriex.

De Jeuggarde waert getraind door Fon Custers en de begeleidsters zeen Mietzie Hendrix en Wilma Favre. De showdans van de Jeuggarde is dit jaor op 'ne eige Jubelijemmix van veer versjillende leedjes.

5-3-2014:

twee Uulemaedjes (Aan de Roer en De Sjapsjtein)

Ich bön gebaore op as-woondaag 2003. Det is in 2014 dus 1x11 jaor geleje! Op 5 meert bön ich weer op as-woondaag jäörig. Ich bön gebaore in 't AZM krankehoes in Mestreech, ómdat ich toen te klein waas. Ich zit op de Openbare Basisschool Aan de Roer in klas 7b biej juf Diana Mouton. Mien hobbie is volleybal. Miene pap volleyballt ouch al jaore. Toen ich ging kieke nao 'ne aope daag van VC Herten, waas ich ouch helemaal órn. Noe volleyballt ich al 2 jaor. Ich vinj Vastelaovend super, ómdat se verkleid kins gaon en des se same plezeer höbs. 'ts ouch altied gezellig en 't leukste van alles vinj ich de leuke meziek! Verder vinj ich 't getal 11 bès waal grappig ómdat d'r twee keer de 1 in zit. Meistal vier ich 3 daag en dan höb ich ouch 3 keer 'ne angere outfit aan. Veer gaon dan mit vrunj eers nao d'n optoch kieke en daonao de kefees in. Mien outfits diej ich mich nog kin herinnere zeen: stewardess, teletubbie, clown, pipi, flamingo-danseres en doktersassisteente. Ich wins uch allemaal 'n gezellige Vastelaovend en mesjen kóm ich dich waal örjes in de sjtad taege! ALAAF!

GWENN VAN DEN BOOM

12



MAAIKE SMEETS

Van kleins aaf aan vier ich Vastelaovend in Remunj en Herte. Vastelaovend beteikent veur mich det ich mich lekker doon verkleije en sjminke, de haor verve en nao boete gaon. Door 't jaor haer verkleijt ich mich ouch heel dök, mer dan gaon ich dao neet mit de sjtraot op. Veer kieke altied nao d'n optoch in Remunj. Danse en hosse doon ich altied biej de Plekkers in Kefee Zaal de Sjuur in Maerem. Normaal gesjprake is 11 't gekkegetal, veur mich is det dus 'n gans normaal getal. Gek doon, danse en zinge is mich op 't lief gesjreve. Ederein in mien ómgaeveng haop det dit zo blief es ich 1x11 bön. En nog gekker moog netuurlik altied, zo lang ich mer plezeer höb.

Mien hobbies zeen atletiek en daonao... danse en zinge! Veur miene verjördaag haaj ich same mit mien vriendinne 'n sjlaopfeesje. Det ich mit de Vastelaovend 1x11 jaor waer vinj ich héél bijzónjer. Alleen al ómdat ich dan op miene verjördaag neet nao sjool hoof!

13

Kleurplaat



The logo features the words "DE SMURFS" in large, stylized yellow letters with red outlines. The letters are set against a red background that has white zig-zag patterns. Two cartoon Smurf characters are positioned behind the letters: a blue one on the left and a white one on the right. Below the main title, there is a smaller circular logo containing a clown's face with the word "ZEN-SJNAP" around it.



SUNAPSNAAZEBAL

VASTELAOVESZAOTERDAAG TOET EN MIT VASTELAOVESDINSDAAG 1, 2, 3 EN 4 MEERT

**ZAOTERDAAG TOET EN MIT MAONDAAG IN 'T WITTE KIRKSKE VAN
16.00 TOET 20.00 OER.**

OP DINSDAAG IN DE SALLE DE FETE VAN DE ORANJERIE VEUR 'T
AAFTRAEJE VAN DE SUTADSJUEGPRINS VAN 16.00 TOET 18.30 OER.

ANTREE: GRATIES

VEUR ALLE KIENJER VAN O TOET 'N JAOR OF 12



[WWW.FACEBOOK.COM/SJNAPSNAZEBAL](https://www.facebook.com/sjnapsnazebal)

Móppetrómmel

Welk instermint
wirk nooit mit?

„u Dwarsstuit.”

D'r is 'ne nuje meister in de klas en hae wilt weite of de kienjer in zichzelf gluive. Daoróm zaet d'r: "Waem zich zelf dóm vindj geit sjtaon." Nao 'n gooij menuut sjteit Sam op en dan vreug de meister: "Dinks se ech des se dom bös?". Sam antjwaord: "Nae, mer ich vónj 't zo zielig det geer dao zo allein sjtaot."

Wó köp 'n koe zien kleijer?

In de boe-tiekel

"Laot dien rapport 'ns zeen Christophe." zaet ziene pap. "Kan neet. Ich höb 't aan Renske oetgeleend óm zien pap en mam flink te laote sjrikke."

Waat duit 999 keer tik
en eine keer tak?

houtere poot.
, ne deezendipoot mit, ne

D'r loge 'ns twee óngerbókse in de wasmanj. Zaet de ein óngerbóks: "Ich gaon binnekórt op fekansiej." Zaet diej anger óngerbóks: "Ich hoof neet meer op fekansiej, want ich böñ al broen genög!"

Rutger geit mit zien mam nao de sjlechter en krieg 'n sjiefke wórs. Zien mam zet: "Waat zaes se dan taege de sjlechter?" Wó op Rutger zaet: "Ich lös d'r nog waal ein!"

Wiej zól 'n vleeg
heite es ze gein
vleugels had?

„u Loup.





Wiej regels se 'n groot fees?

**Es se 't euver'n jubeleijem höbs,
dinks se aan 'n fees! Weit geer wiej
se 'n groot fees mós organisere? Es
veurzitter van 't SJAB wèt Janneke
Cartens heel good wiej det mó. 'n
Aantal leje van 't SJAB zorg d'r namelik
eder jaor veur det de Sjolefestasie
weer een groot en gesjlaag fees is. De
Sjolefestasie is 'n groot meziek fees op
Vastelaovesvrijdaag veur de jeug van
Remunj en omgaeveng.**

De organizasie van de Sjolefestasie van dit jaor besjteit oet Janneke, Jules, Manon, Willeke, Vicky, Pepijn, Felix en Joy.

Waat kump d'r allemaol biej kieke?

- **Artieste regele:** eder jaor mótte d'r weer 'n paar nuuj artieste biej kómme en dao mótte heel väöl aafsjpraoke waere gemaak
- **Vrijwilligers vraoge:** diej verkoupe de drank aan alle bezeukers
- **Reklame make:** neet allein door posters te make en op te hange, mer biej veurbeeld ouch door 'n

- promosiefilmke make
- **Sjponsors regele:** det zeen bedrieve diej 'n deil van de koste betale of diej sjpulse levele
- **Aankleijing verzorge:** neet allein leuke dinger bedinke (sjlingers of confetti), mer ouch aansjaffe en ophange of insjtallere
- **De pers informere:** d'r mó namelik ouch in de gezet of oppe tilleviesiej reklam waere gemaak
- **Väöl vergadere:** al diej zake hiej baove waere door 'ne eige wirkgroep geregeld. Waat diej regele mó netuurlik good op elkaar aansjloete en daoróm waert det allemaol same besjpraoke.

- De organizasie van de Sjolefestasie krieg ouch hulp van de organizasie van de Sjtadsfestasie. Det is 't grote fees op zaoterdag. Diej miense zorge veur 'n paar anger dinger diej heel belangrik zeen veur 'n fees:
- **'t podium** veur de artieste en veur de Sjtadsjeugprins mit zien

- Adjudante en Prinselike assistent
- **de geluidsinstallatie,** zódet ederein alles good kint heure
- **de beveiligung;** dranghekke en bewakers
- **de kassa's** wó se bónne kins koupe
- **de drank** veur alle bezeukers diej dórs kriege van 't feeste

'n Oetgangspunt biej de organizasie van de Sjolefestasie is: 't is 'n fees door de jeug veur de jeug. De jeug in de organizasie krieg daoróm de ruumte óm mit väöl nuuj iedeje te kómme. Ein van de wirkgroepes is de wirkgroep **'creatief brein'**. Dees sjlummerike bedinke sjpektakulaire en nuuj dinger. Biej veurbeeld 't promosiefilmpje, de konfettikenónne en iets ludieks óm 't prinske (*redaksie: halloo, de Sjtadsjeugprins van D'n Uul zolt geer bedoele!*) oppe buun te prizzentere. Veurig jaor moch Damiaan I mit 'n ech CO2-gewaer sjete (*redaksie: Prinske? Duh!*)

Janneke vindj 't enthousiasme van de jeug geweldig. Ederein haet d'r väöl zin. En ouch al kómme d'r 7.000 (!) miense, 't is ech 'n fees veur de jeug en det moog zo blieve. Ómdet 't fees euerdaag is, moge ouch Uulkes diej nog gein 12 jaor zeen bès aeve mit pap of mam kómme kieke. Van ein oer toet half zes is d'r meziek van bekinde en minder bekinde Vastelaovesartieste.

Kienjer tösse de 12 en 25 jaor, kinne ouch oppe grote buun optraeje es winnaar van 'Sjolefestasie wants talent'. 'n Veurbeld hiej van is Maurice Fermont. Hae deej veurig jaor mit es zanger en DJ en is noe de vaste DJ dae de meziek tösse de optraejes door regelt.

Zo, dus gank mer 'ns kieke oppe Sjolefestasie, organizeer zelf nog 'n paar verjäördaagsfeesjes en melj dich dan aan biej 't SJAB van D'n Uul!

Weetjes Sjolefestasie

De Sjolefestasie in 't kort:

1x **11** vergaderinge per jaor

7x **11x11** e-mails in 'n jaor

11 toet de mach **11** (ontelbaar väöl) What's App berichjes

11x11 posters in de sjtad

2x **11** vrijejwilligers aan de kassa op vrijejdaag

3x **11** vrijejwilligers biej de tappunte

2x **11** backers fris veur 1x **11** penninge

1x **11** oer bezig op 't plein van 8 oer toet 19 oer

De 8 leje van de organizasie zeen biej elkaar 181 jaor, dus

gemiddeld 2x **11** jaor

Meer dan 4x **11** versjillende artieste höbbe al oppe

Sjolefestasie gesjtaon

Alle middelbare sjole oet de buurt höbbe de ganse daag of
vanaaf 12 oer vrijej

Kiek oppe site www.sjolefestasie.nl veur alle info en regels

Waat zeen SJABBE?

'n Aantal jaor geleje vónje de grote miense van D'n Uul det de kienjer ofwaal de jeug van D'n Uul meer biej de Vastelaovend betrókke móste zeen. De jeug wèt namelik zelf heel good waat ze leuk vindj en door zelf ouch mit te helpe doon d'r meer kienjer mit aan de ivvenemente veur de jeug. En... door al jónk mit te helpe mit organizere blieve ze es ze later groot zeen mesjien ouch waal mit helpe biej D'n Uul. Want de vereniging haet héél väöl kemissies en wirkgroepes diej alles regele veur alle Uule ivvenemente. Biejveurbeeld de kemissie diej 't oetrope van Jeugprins Sem I haet geregeld en diej ouch zien resepsie geit regele.

Daoróm waerde d'r toen ein appaarte kemissie opgerich veur de jeug. En diej zól besjtaon oet allein mer jeug van D'n Uul. Det waerde 't SJAB! S.J.A.B. is de aafkorting van **Samewirkend Jeug Algemein Besjtuur**. Net wiej de grote miense 'n Algemein Besjtuur höbbe, haet de jeug det noe ouch. 't SJAB organizeert versjillende ivvenemente veur de jeug van Remunj. 't Bekindste is 't Sjnapnaazebal.

Wils dich (euver inkele jaore) ouch lid waere van 't SJAB? Melj dich dan es se nao de grote sjool geis aan biej D'n Uul. Vanaaf 15 jaor moogs se dan ouch mit helpe mit de organizasie van de Sjolefestasie. D'r is mer ein echte belangrieke veurwaarde óm biej 't SJAB te kómme. En det is: echte SJABBE höbbe 'n ech vastelaovesgeveul!

S.J.A.B.



De Vaere van Uulalia!

Hallou kienjer van Remunj!! Weit geer eigelik waal wie 'ne Jeugprins van D'n Uul oetgekaoze waert? En waem det det duit? 't Grote geheim van D'n Uul waert uch noe verklap. Es geer 't nog neet wilt weite, laes dan mer neet wiejer en kóm geweun kieke nao de Kienjermiddaag.

Wilt geer 't waal weite? De Prins waert al 7x11 jaor oetgezòg door Uulalia! Es de Prins nog 'ne kleine baby is kump Uulalia 's nachs op bezeuk en plant dan ein vaere zäödje in 't köpke van de baby..... En es dae jóng dan biejnao 1x11 is begint det vaerke te greuje...

Maar wat gebeurt d'r es 't noe 'n maedje is det op 'ne daag ein vaer oet de kop veult greuje? Waat dan? Kriege veer biej D'n Uul dan (eindelik) 'n Prinses?? Haet Uulalia 'n fout gemaak of is det 'n waal euverwaoge keuze gewaes?

De maedjes, die gaer 'n Prinses wille, gaon op zeuk nao Uulalia om 't häör te vraoge. Mer dan zeen d'r nog de Fritskes! Eur pap en mam kinne diej twee raeckels nog waal van vreuger. Grote Frits vindj 't mer kwatsj: 'n Prinses!

D'r mótt 'ne Prins kómme en d'r is mer eine goje: Frits d'n Eerste!! Mit Fritske es adjudant!!

Óngerwiel det de maedjes op waeg zeen nao Uulalia, verdwiene d'r euveral vaere. Waat is d'r toch aan de handj? Höbbe veer sjtraks dan en gein Prinses, mer ouch geine Prins...

Op zónndaag 23 fibberwarie kint geer d'r achter kómme waat d'r aan de hand is. Kóm same mit femielij, vrunj of kienjer oet de klas nao de Kienjermiddaag van D'n Uul. Nao aafloop kint ederein in de Salle de Fête nog gezellig get drinke en aeve biekómme van de Vaere van Uulalia.

Aan de Kienjermiddaag 2014 doon väöl kienjer mit van sjole oet Remunj en zelfs dao boete. D'r zeen óngeveer 7x11 akteurs, dansers, zengers en trommeleers. Same bringe diej uch 't verhaol van 'de Vaere van Uulalia' det is gesjreve door Ton II Nizet. De leedjes zeen gesjreve door Hans Leijendeckers en ouch de Jeuggarde speelt weer 'n muzikale rol. De veursjtëllinge zeen in de Theaterzaal van de Oranjerie op zónndaag 23 fibberwarie om 13.30 oer en óm 15.30 oer. Kaarte zeen te koup biej de theaterkassa en via de website van de Oranjerie.

Geer kint de veurbereidinge en al-lerlei nuujs van de Kienjermiddaag ouch volge op Facebook.

Es sjlótleed waert dit jaor weer 't leed gezónge det vreuger al gezónge waerde biej de Kienjermiddaag van D'n Uul: Hiej is vastelaovend! Teks en meziek zeen van Minnesjtreel van D'n Uul Naud Reyners. Hiej ónger sjteit de teks al, zodet geer kint rippetere!

Hiej is vastelaovend

Refrain:

Mer hiej is Vastelaovend,
jao hiej kan 't neet op.
Van de morge toet d'n aovend,
sjteit 't hele gedoons oppe kop.
Lai-la, lai-la, 't is eine grote hoempapa.
Lai-la, lai-la, 't is eine óngerein.

In 't werme Akapoelko,
lop me noe nog aan 't sjstrandj.
Zjweite doon ze zich te barste,
mit ein muulke det ram is verbrandj.

Refrain

In 't kaaje Lillehammer,
drink m'n noe nog heite thee.
Ózel lieje doon ze duchtig,
mit dae thee zit ze deep in de sjnee.

Refrain 3x

Kienjermiddaag D'n Uul
23 fibberwarie 2014

Aanvank 13.30 oer en 15.30 oer
Antree 6 euro; volwassene 9 euro

Theaterzaal de Oranjerie

Nao de veursjtëlling fees in de Salle de Fête
Antreekaarte te koup biej de Oranjerie
www.facebook.com/kienjermiddaag.dnuul


'ne Baom inne boek

Veur des se nao 'n fees geis of nao d'n optoch geis kieke, mós se 'ne baom inne boek höbbe. Dan höbs se 't neet zo sjnel kaad en dan velt dae cola neet zo kaad inne maag. Zo'ne baom kins se gemekkelik zelf verzorge door dich 'n lekker Uule gerech te make.

Uule botteram

Waat höbs se neudig veur ein bótteram:

2 sjneje mik
bótter
kees of sjónk
kómkommer
reziene
'n wurtelke
'n bótterammemets



Wiej maaks se ze klaor:

Pak 2 sjneje mik en sjmeer dao get bótter op. Belijk ze mit dien favoriete belag. Sjniej dan 2 sjiefkes kómkommer en ligk diej op de juuste plaats es uigskes. Maak de uig aaf mit 1 reziene in 't midde van eder sjiefke. Maak 't wurtelke zuver en sjniej d'r 'ne driehook oet. Dae ligks se oppe plaats van de naas. Sjniej noe mit 't mets de vleugels van d'n uul.

Tip: maak d'r 'ne tosti van. Dan maaks se eers de tosti en maaks se dao nao de uig, de naas en de vleugels.

24

Uule Pizza tomaat, champignon en kees

Waat höbs se neudig veur eine pizza:

pizzabaom
pötje pastasaus
2 tomate
champignons
geraspte kees
'n erpelemetske




Wiej maaks se 'm klaor:

Pak 'ne kantj en klaore pizzabaom oet de winkel of sjniej 'n platte Turkse mik door midde en sjmeer dao 'n läögske pastasaus euver haer. Sjtruij noe de geraspte kees d'r euver. Sjniej de vleugels los en sjniej 't sjtökske tösse de eurkes weg. Sjniej de tomaat in plekskes en ligk diej oppe vleugels van d'n uul en gebroek d'r twee veur de uig. Sjniej de champignons in sjiefkes en gebroek diej veur de uig (sjiefke van de sjeel), en de boek. Veur de veutjes maaks se lange sjmale sjiefkes. Ligk de pizza op bakpepier op de aove reuster en laot de pizza in óngeveer 15 minute in 'ne veurverwermde aove.

Uule pizza oje, kees en tonien

Waat höbs se neudig veur eine pizza:

pizzabaom
pötje pastasaus
'n rooij ooj
'n blikske tonien (op water)
geraspte kees
'n erpelemetske



Wiej maaks se 'm klaor:

Pak 'ne pizzabaom; biej veurbeld diej anger helf van diej platte Turkse mik en sjmeer dao 'n läögske pastasaus euver haer. Laot mam of pap de ooj in sjiefkes sjnieje (dan hoofs se zelf neet te janke). Ligk twee sjiefkes op de plek van de uig. Sjniej anger sjieve door midde en lik die sjtökke van groot nao klein en van baove nao ónger es de vleugels van d'n uul. Twee klein rundjes ligks se baove de uig es winkbrauwe. En mit 'n paar sjtökskes maak se de veutjes van d'n uul. Sjöd 't water van de tonien aaf en sjtruij óngeveer 'n half blikske tonien euver de boek van d'n uul. Sjtruij noe nog get geraspte kees euver de tonien. Ligk de pizza op bakpepier op de aove reuster en laot de pizza in óngeveer 15 minute in 'ne veurverwermde aove.

Bedink diene eige Uulepizza of Uulebótteram en sjtuur 'n foto nao uulewapper@dn-uul.nl.

25

't Is fees in de sjtad biej D'n Uul!

Sjtadsvastelaovesvereniging D'n Uul besjteit 7x11 jaor. Mer veurdet Thei I van Geldrop in 1937 de eerste Prins van D'n Uul waerde, waas d'r ouch al fees in de sjtad.

In 1884 waerde de **Flarusse** opgerich. Mit de vastelaovend organiereerde diej 'n gemaskerd bal en ziej hadde al 'ne Raod van Elf mit 'ne Hoogheer Flarus XI. De Flarusse höbbe óngeveer 3x11 jaor besjtaon.

In 1898 begós 'ne groep vrunj diej gaer piep roukte mit de **Vereeniging de 10 Schmookers**. Ziej organiereerde ouch feeste en hadde ouch 'ne Raod van Elf. De Schmookers höbbe ouch óngeveer 3x11 jaor besjtaon.

In 1927 waerde door de groep **Haaj voot biej sjtök** de eerste optoch georganizeerd mit... de eerste Vastelaovesprins van Remunj. Waarsjenlik waas det Victor I Lemmens. De jaore dao nao waas d'r neet eder jaor 'ne Prins.

In 1937 waerde D'n Uul opgerich en dit jaor viere veer 't 7x11 jubeleijem van D'n Uul mit Prins, Raod van Elf, gemaskerd bal en optoch!

't Is fees in de sjtad biej D'n Uul!

Mer 't is neet allein fees biej D'n Uul. **De Veldjmuus** oet de wiek 't Veldj viere häör 6x11 jubeleijem en de **Kits Uule** oet de wiek Kitskesberg viere häör 4x11 jubeleijem.

Ouch in Gelaen höbbe ze driej jubelerende vereniginge. En raoj 'ns wiej twee van diej driej heite: De Uule (7x11) en De Flaarisze (6x11) !!

In gans Limburg zeen mesjiens waal meer dan 4x11x11 vastelaovesvereniginge. Eder jaor zeen d'r dus in noord, midde of zuid Limburg waal feesjes. Dit jaor biej veurbeeld biej de Kujeldreijers, de Halve Gare, de Smautbulen, der Vooseschtoets, de Woeësj-juupkes en netuurlik biej ós vrunj de Rogstaekers oet Wieërt. En in Zitterd viere de Marotte dit jaor häör 12x11 jubeleijem! Alaaf!!



Lange Uul

De jeug van D'n Uul wet waarsjenlik waal det d'r eder jaor 'ne angere jaormedalje is. Zo'n medaljes waere noe al óngeveer 3x11 jaor oetgerek. Al 'n aantal jaore is d'r ouch 'n motto. Veurig jaor waas det biej veurbeeld **'t geit veuroet**. Det motto is dan verwirk in de jaormedalje. In 'n jubeleijemjaor is d'r gein motto, want dan is d'r: de **Lange Uul**. Det is de jubeleijem medalje dae vanaaf 't 2x11 jubeleijem waert oetgerek. Edere keer zuut dae d'r 'n bietje angers oet. En dit jaor zuut de Lange Uul d'r zo oet:

Nog 'ne jubelares

De TC van D'n Uul viert dit jaor häör 4x11 jubeleijem! Eigelik besjtaon ze al vanaaf 1963, mer allè. De miense van de Technische Commissie zorge biej Uule ivvenemente veur de buun, 't geluid, 't dekor, de versieringe van de zaal, num mer op. De TC haet häör eige medalies: de Wirkaezel. Eine drager van de Golje wirkaezel is Hank Rietra en dae haet 1x11 jaor geleje 'ne sprek veur de TC bedach. Oefen dao mer'ns op:

Goje daag, dit is de TC...

*Diej dette waate det doon
diej doon det
want es diej det neet deeje
waar d'r geine dae det deeje
daoróm dachte diej
dette waate det doon
dan doon veer det mer geween
want angers is t'r toch geine
dette waate det duit.*




Puzel

Waardzeuker

Zeuk alle geneumde wäörd op en sjtreep ze door in de puzel.

Vul de letters diej se euver hils óngeraan in en roop de oplossing heel hèl door de kamer!



- vastelaovend
- uulewapper
- assistent
- middaag
- hokkiej
- jaor
- diskò
- garde
- sjieps
- jubeleijem
- sjlager
- jeug
- kienjer
- kusje
- fees
- prins
- gek
- starwars

Oplossing:

, ,

!

Droedels

Droedels? Det zeen räödselkes of waordsjpelkes wó mit letters, siefers of plaatjes wäörd waere oetgebeeld. De plaats van de ein letter ten opzichte van de anger maak dao biej ouch dök nog get oet. Juulke, dae heel gaer in 't plat mit wäörd sjpeelt, vertelt uch hiej ónger 'n verhäölke. Weit geer wó 't euver geit? Sjtuur Juulke dan 'ne e-mail mit eur 'vertaling'. Suk6 mit laeze!

Juulke: Hallou A3! 't Is biejnao



Zal ich FF T zitte?

A3: Det is 'n



! Mer W8 FF.

Juulke: Wórom W88? Doe



neet miene BAA.

A3: Ich gaon dalik nao 't



?

Want dao geit eder1 haer.

Juulke: Geis se ouch mit nao de



middaag. Det geit dit jaor euver 'n paar

Q diej op zeuk zeen nao 'ne



+DE ringe veur aan de GGR

A3: HHH, ich gaon mit, want ich L8 mich noe al eine $\frac{1}{11}$!

En weit geer welke wäörd dees plaatjes veursjtelle?



(klossennummers)



(feestnummers)



(sjildpad)



(plekbandj)

't Is fees! - Kienjergarde 7x11 Jubeleijemleed

De Kienjergarde van D'n Uul haet dit jaor 'n eige jubeleijemleed!
Op de website van D'n Uul kint geer biej de Uulewapper 't leedje aafsjpele.
Leer uch de tèks zo det geer 't edere keer kint mitzinge.
Want 't is FEES!

Couplet:
't Is noe fees biej D'n Uul, biej ós in de sjtad.
Zeve maol ellef jao, det zeen jaore zat.
Al diej jaore wore toch heel sjoon.
Die zatte toen de toon!

PK, de gardemaedjes, de raod is d'r biej.
Prins en zien adjudanten, sjloete de riej.
D'n Uul dae is d'r klaor veur, ze sjtelle zich op.
Dit jaor waert 't top!

Refrain:
Veer wille danse, jao danse, veur oze leve Prins.
Lekker mit diej bein de lóch in.
Veer wille danse, jao danse, veur oze leve Prins.
Gaer zo dök es 't mer kin.
Want 't is fees, fees, fees, in de sjtad biej D'n Uul.
Want 't is fees, fees, fees, in de sjtad biej D'n Uul.
Want 't is fees, fees, fees, in de sjtad biej D'n Uul.
Jao, 't is fees!

Couplet:

Vastelaovend viere, zit ós in 't blood.
Want van jóngs aaf aan, duis se 't good.
Nao de Kienjermiddaag, 't Sjnapsnazebal.
Dao leers se 't toch all!

Eder jaor nao de kirmes, det heurt d'r biej.
Same in de rups, knus ziej aan ziej.
Dao nao 'n täötje sjlòk, dao sjmulle veer van.
Zo väöl es 't mer kan!

Refrain: 2,5x

Veer wille danse, jao danse, veur oze leve Prins.
Lekker mit diej bein de lóch in.
Veer wille danse, jao danse, veur oze leve Prins.
Gaer zo dök es 't mer kin.
Want 't is fees, fees, fees, in de sjtad biej D'n Uul.
Want 't is fees, fees, fees, in de sjtad biej D'n Uul.
Want 't is fees, fees, fees, in de sjtad biej D'n Uul.
Jao, 't is fees!

Tèks:
Zang:
Orzjeneel:

Ingrid Breugelmans en Nienke Wassenberg
DJ Kloekie ft. Captain Iclo (Loek van den Brand en Igor Costa Lorenzo)
Santiano

Ein Döbbelinterview mit de Uuleprinse 2014

Roger I

Waas 't al ooit eure druim óm Prins te waere?
Jao! Vanaaf det ich begin jaore '90 van de veurige eew in Remunj bön kómme wone en zoog waat D'n Uul veur 'n sjitterende vereining is en wiej sjiék 't is óm Prins te zeen van D'n Uul, höb ich d'r van gedruimd óm Prins van Remunj te waere.

Gaot geer 't misse óm wiej anger jaore mit al eur vrunj vastelaovend te viere?
Nee, eigelik neet. Ich vier vastelaovend altied mit mien vrouw Muriel en mit twee van mien beste vrunj en häör vrouwluj. En die twee vrunj zeen noe mien adjudante. Dus veer gaon dit jaor vastelaovend zelfs nog intensiever en väöl langer same viere!

Höb geer al 'ns'n jubeleijem mit gemaak?
Nog neet ech mit gemaak. Waal bön ich noe es veurzitter van de tennisclub RTC N.I.P. intensief betrokke bij de organizasiej van 't 100 jäörig besjaon. Same mit twee Aad Prinse euveriges, Hans I en Kes I. En dao kump heel get biej kieke, bön ich al achter. Dus ich höb noe al heel väöl respek veur de organizasiej van 7x11 D'n Uul! Det waert ein sjitterend fees!

Nao welk vastelaoves ivvenement kiek geer 't meiste oet?
Det waas altied 't Verkesbal. Det is 't noe ouch nog waal, mer 't liek mich ouch heel erg sjiek óm es Sjtadsprins van Remunj oppe buun van de Sjtasiefestasie te sjtaon. En dan mesjien nog waal 'n leedje te moge zinge... En de Nach natuurlik! Diej is deze keer gans angers es anger jaore... Mer det sjpriks veur zich.

Wiej zeet geer toet de keus van de leje van eur prinselik gezelsjap gekómme?
't Zeen mien beste vrunj en de jonges wó ich altied vastelaovend mit vier. Miene druim óm Prins te waere waerde häöre druim óm Prinselik Gezelsjap te waere. Dus toen de PKBK kwaam vraoge of ich Prins wól waere, wis ich drek waem de leje van mien Prinselik Gezelsjap zólle waere. Geine twiefel meugelik!

Waat vindj geer 't meis biezónjere óngerdeil van eur prinsepak?
De möts en de vaere!

Waat wilt geer de laezers van de Uulewapper nog vertèlle?
Det ich d'r es Grote Prins, mesjien waal nog meer es de veurige Grote Prinse, nao oetkiek óm väöl mit de Jeugprins en zien Gezelsjap op te trèkke. En geer kint noe waal raoje wooróm!



Sem I

Waas 't al ooit eure druim óm Prins te waere?
Jao. Vanaaf det ich 3 maondj aad waas ging ich mit mien pap en mam mit de Vastelaovend mit en leep ich de optoch mit de Sjtadtsgarde. Toen ich 4 jaor aad waas ging ich mit doon mit de Kienjermiddaag. Ich had toen ein doel veur ouge..... de hoofrol in de Kienjermiddaag es ich 11 jaor zou zeen. En dae druim is noe oetgékommme, mer dan de hoofrol in de Vastelaovend veur gans Remunj.

Gaot geer 't misse óm wiej anger jaore mit al eur vrunj vastelaovend te viere?
Nae. Ich gaon de Vastelaovend juus baeter viere mit mien vrunj. Want mien vrunj zeen mien adjudante! Deze Vastelaovend gaon ich juus knalle. Veer wille nieks misse en veer wille ós laote zeen aan gans Remunj!

Höb geer al 'ns'n jubeleijem mit gemaak?
Jao. Ich waas mit 6x11 driej maondj en mien pap en mam nome mich toen mit. Drie jaor geleje had de Sjtadtsgarde 3x11 jubeleijem. Miene pap zit biej de Sjtadtsgarde en ich loup eder jaor mit hem d'n optoch mit biej de Sjtadtsgarde. Ich vónj't altied leuk om de mimosa oet te deile aan de miense aan de kantj.

Nao welk vastelaoves ivvenement kiek geer 't meiste oet?
Poehhh, det vinj ich 'n meujelike vraog ómdat ich neet kin keze. D'r zeen versjillende ivvenemente wó ich nao oet kiek: optoch, sjolefestasie, sjtasiefestasie, jeugdisko en mien eige resepsie. Mer es ich móet keze dan kees ich veur de sjolefestasie.

Wiej zeet geer toet de keus van de leje van eur prinselik gezelsjap gekómme?
Christophe is miene vrundj en klasgenoot, Rutger is miene hockeyvrundj en Renske kin ich al heel lang en is wiej'n saort nichske veur mich. Daoróm wól ich Renske d'r ouch gaer biej höbbe, mer det kós eigelik neet, ómdat 't 'n maedje is. Daoróm is 't noe miene PA, Prinselike Assistent.

Waat vindj geer 't meis biezónjere óngerdeil van eur prinsepak?
't Prinsekruuts. Hiej in zit alles verwirk waat mit mien laeve van noe te make haet.

Waat wilt geer de laezers van de Uulewapper nog vertèlle?
Geneet van de kómmende Vastelaovend! Veer gaon mit ós veere knalle en d'r 'n super fees van make. Ich zól t sjoon vinje es geer mit ós mit zólt doon mit miene sjpreuk: mit D'n Uul 7x11, gek doon veer zellef!



Jeugdisko

2 en 3 meert

Vastelaoveszóndaag en
vastelaovesmaondaag
in 't Achterhoes in de
Veursjstad

- van 20.00 oer
toet 22.30 oer
- veur de jeug van 11
toet en mit 16 jaor
- Antree: gratis

Lèt op:

Kienjer oet gans groot Remunj moge nao de disco
kómme! Dus neet allein Ulekienjer oet de binnesjstad.



COLOFON:

Oetgaaf:
Sjtadsvastelaovesvereniging D'n Uul
Posbös 11, 6040 AA Remunj

Vormgaeving:
Kim Vossen, Jeroen van Beek
Ars Grafisch

Drök:
Ars Grafisch



Ketak:
www.dn-uul.nl
uulewapper@dn-uul.nl



Hooffriddakteur:
Juulke

Riddaksie:
Anne Kouwenberg
Bridget Wassenberg
Damiaan Bertrams
Roel Hendriks
Sabine Koopman-Lyon

Mit dank aan:
Erik Snoek
Janneke Cartens
Jean Gouders
Mariëlle Jereskes
Ronald Klaver
Ton II Nizet
Sjtadsjeugprins van D'n Uul 2014:
Sem I
Sjtadsprins van D'n Uul 2014: Roger I

Fotoos:
Alexander, Gwenn, Lisa, Luuk,
Maaike
Foto Studio Bongers
Harry Allers
PhotoCord Fotografie
De riddaksie leje

Copyright 2014
Alle sjrieverrechte mit
betrekking toet de inhald van
dees oetgaaf waere oetdrökkelik
veurbahje. Dees rechte beroste
bij Sjtadsvastelaovesvereniging
D'n Uul Remunj ofwaal bieje de
betreffende sjriever.



D'N UUL PRIZZENTEERT VEUR DE JEUG VAN REMUNJ...

12-01-2014 | Vanaaf 13.00 oer

Middaag van de Nuuje Sjtadsjeugprins van D'n Uul
Salle de Fêtes van de Oranjerie

16-02-2014 | Vanaaf 13.30 oer

Resepsie Sjtadsjeugprins Sem I van D'n Uul
't Witte Kirkske in de Veursjtad

22-02-2014 | Óm 17.30 oer

Vastelaoveskirkdeens | *St. Christoffel Kathedraal aan de Mert*

23-02-2014

Veursjtellinge óm 13.30 oer
en óm 15.30 oer

Kienjermiddaag: De Vaere van Uulalia

Theaterzaal van de Oranjerie

Kaarte te koup biej de Oranjerie: kienjer € 6 en volwassene € 9
Aansloetend naozit in de Salle de Fête van de Oranjerie

28-02-2014

Van 13.00 toet 17.45 oer

Sjolefestasie | *'t Sjtasieplein*

01/02/03-03-2014

Van 16.00 toet 20.00 oer

Sjnapsnaazebal | *'t Witte Kirkske in de Veursjtad*

04-03-2014

Van 16.00 toet 18.30 oer

Sjnapsnaazebal | *Salle de Fête van de Oranjerie*

02/03-03-2014

Van 20.00 toet 22.30 oer

Jeugdisko

in 't Achterhoes in de Veursjtad

03 -03-2014 | Vanaaf 13.00 oer

De Grote Optoch | *door de sjtraote van Remunj*

04-03-2014 | Vanaaf 18.30 oer

Aafraeje Sjtadsjeugprins Sem I van D'n Uul | *Salle de Fête van de Oranjerie*

